

PEMBERITAHUAN PERTANYAAN

DEWAN RAKYAT, MALAYSIA

PERTANYAAN : **LISAN**
DARIPADA : **YB TUAN FONG KUI LUN**
KAWASAN : **BUKIT BINTANG**
TARIKH : **16.6.2014 (ISNIN)**
NO. SOALAN : **161**

YB Tuan Fong Kui Lun minta **MENTERI PERDAGANGAN ANTARABANGSA DAN INDUSTRI** menyatakan butiran perjanjian TPPA yang dipersetujui dan tidak dipersetujui Malaysia dan apa pula reaksi dengan cadangan China yang bercadang untuk mewujudkan perjanjian perdagangan rantau yang lain.

Jawapan

Tuan Yang DiPertua,

Penglibatan Malaysia dalam perjanjian perdagangan bebas seawal tahun 1992 dengan termeterainya ASEAN Free Trade Agreement, dengan izin, adalah berpandukan kepentingan negara bagi memastikan Malaysia mampu bersaing dalam pembangunan ekonomi dan rakyat Malaysia boleh memiliki kualiti hidup yang terbaik mampu dilaksanakan oleh kerajaan.

Pengalaman lepas telah menunjukkan bahawa Malaysia mendapat faedah daripada FTA. Sebagai contoh, sejak FTA antara China dan ASEAN pada tahun 2005, perdagangan Malaysia dengan China telah meningkat tiga kali ganda kepada RM203.2 bilion pada tahun 2013 berbanding RM67.1 bilion pada tahun 2003. Eksport Malaysia ke China juga meningkat lebih dari tiga kali ganda kepada RM97 bilion bagi tahun 2013 berbanding RM25.8 bilion pada tahun 2003.

Kawasan Perdagangan Bebas Asia-Pasifik ataupun *Free Trade Area for Asia Pacific* (FTAAP) yang dicadangkan oleh China bukan perkara baru. Perkara ini telah mula dibangkitkan dalam APEC yang dianggotai oleh 21 buah negara pada 2004 melalui Majlis Penasihat Perniagaannya. Berikutan itu pada tahun 2006, Pemimpin-Pemimpin APEC mengiktiraf prospek jangka masa panjang FTAAP untuk diwujudkan sebagai mekanisme bagi mencapai integrasi ekonomi serantau. Pada Mei lalu, Mesyuarat Menteri Perdagangan APEC telah bersetuju untuk menggiatkan usaha ke arah merealisasikan FTAAP.

Manakala bagi TPP, ia merupakan rundingan perjanjian yang melibatkan 12 negara Asia Pasifik iaitu, Brunei, New Zealand, Chile, Singapura,

Amerika Syarikat, Australia, Peru, Vietnam, Malaysia, Canada, Mexico, dan Jepun.

Bagi RCEP pula, ia merupakan satu inisiatif FTA yang dicadangkan di kalangan ASEAN bersama rakan dialognya yang terdiri daripada China, Jepun, India, Australia, New Zealand, dan Korea. Salah satu matlamat RCEP adalah untuk mengintegrasikan serta mengukuhkan lagi FTA ASEAN yang sedia ada.

Kesemua negara yang terlibat dalam TPP serta RCEP adalah merupakan ekonomi di bawah APEC (kecuali India). Sehubungan itu, kedua-dua TPP dan RCEP dilihat sebagai 'building blocks' ke arah pembentukan FTAAP. TPP, RCEP mahupun FTAAP mempunyai matlamat yang sama iaitu untuk mengintegrasikan ekonomi Asia Pasifik. Oleh itu, Malaysia menyambut baik cadangan China untuk mewujudkan perjanjian perdagangan rantau yang lain serta merundingkan atas terma sendiri.

Tuan Yang DiPertua,

Ingin dimaklumkan bahawa rundingan TPPA masih lagi berlangsung dan banyak lagi isu-isu yang tertunggak dan belum dipersetujui oleh semua anggota TPPA. Rundingan TPPA mengambil masa yang lebih panjang daripada yang dijangka asalnya untuk dimuktamadkan pada akhir tahun 2013 kerana TPPA amat berbeza dengan FTA yang biasa dan meliputi skop komprehensif yang melibatkan sensitiviti-sensiviti yang berbeza.

Antara Bab yang hampir selesai adalah:

1. Pembangunan;
2. Kerjasama & Bina Upaya;
3. *Regulatory Coherence*;

4. Persaingan dan Fasilitasi Perniagaan;
5. IKS;
6. Kemasukan Sementara (Perkhidmatan);
7. *Intitutional Arrangements*;
8. Dasar Persaingan (Seksyen A); dan
9. Telekomunikasi

Sementara itu, dalam Mesyuarat Menteri-Menteri yang diadakan di Singapura, Malaysia masih terus mengekalkan mandat yang diberi oleh Jemaah Menteri mengenai isu-isu di mana Malaysia mempunyai kepentingan seperti isu-isu dalam bab pelaburan (khususnya dalam Investor State Dispute Settlement – ISDS), alam sekitar, perolehan kerajaan, syarikat hak milik kerajaan – SOE dan hak harta intelek. Tidak ada kemajuan yang dicapai memandangkan sesetengah negara masih mempunyai sensitiviti yang tidak dapat ditangani. Pasukan perunding Malaysia sedang berunding untuk mendapat fleksibiliti yang diperlukan supaya kepentingan dan kedaulatan negara terjamin.

Adalah wajar supaya Malaysia terus menyertai rundingan TPP dan keputusan untuk menandatangani perjanjian ini kelak bergantung kepada analisa menyeluruh samada ianya akan mendatangkan manfaat atau sebaliknya kepada Malaysia. YAB Perdana Menteri juga telah mengumumkan pada Mesyuarat Pemimpin-Pemimpin Negara TPPA di Bali, Indonesia pada 8 Oktober 2013 bahawa kandungan TPPA akan dibentangkan di parlimen untuk dibahaskan.